

## **KOPI MO FAASAOSAOGA TALAFEAGAI A SUI USUFONO**

### **ASO TOFI, 27 AOKUSO 2015**

*Na toe faaauau Taualumaga a le Fono Aoao Faitulafono i le itula e 7:00 i le afiafi.*

*Na toe faaauau Felafolafoaiga i luga o le faitauga faalua o le Tulafono Tau Faaofi o Teuteuga o le Tulafono o Faiga Palota (Nu.3) 2015.*

**FOFOGA FETALAI:** E toe faatalofa atu i le paia ma le mamalu o le Palemene i lenei itula o le afiafi, malo le onosai, malo le tauatai. Faafetai o lea ua toe tatou aofaga potopoto i lenei itula ona o le faamoemoe lava ina ia tuitulimatagau le tatou galuega mai le taeao analeila.

E momoli atu le faafetai ma le faamalo i le onosai mai o sui usufono mamalu uma ua tatou aofaga potopoto lenei afiafi. E tatalo atu foi i nisi o lo o taumafai mai pea i luga o alatetele, faifaimalie mai outou sa, o lena o lo o lava pea le tatou taimi e faaauau ai le tatou galuega lenei po. O le talitonuga e papaaveloa le tatou galuega, e manatu foi e fai alofa i taualumaga a le tatou Malo i le Afioga i le Palemia ma le Kapeneta ina ia faaumaina lenei Tulafono Tau Faaofi aemaise foi nisi Tulafono o mulimuli mai ona faapena foi lea ona tatala le filialii i le tatou Maota, aua le faatinoga o galuega masani. E faapai atu foi i le tapuaiga a Samoa, e manatu o lenei itula o tapuaiga afiafi o pulapula lagoto o le iu ma le manuia o lenei aso i feau, tiute ma galuega Samoa. Faamalo le galulue, faamalo le onosai lenei aso, e talitonu o le taimi tonu o tapuaiga e tatalo atu pea ia outou manatua i talosaga le alofaiva o lou Palemene lenei po.

E faia le tatou malologa ua maea ona saunoa se tasi o sui usufono mo Salega, Afioga Afualo Wood Uti Salele. E manatu ua atoa ai foi nisi o manatu ma finagalo aemaise o fautuaga faaalua i lenei Tulafono Tau Faaofi. O le a soofau ma le sui usufono mo Faasaleleaga Nu.2. Tulai maia Papalii ua avanoa le Maota mo lau saunoaga i lenei itula o le afiafi.

**Susuga PAPALII LIO FAAVAIIVAIOMANU TAEU MASIPAU (Faasaleleaga Nu.2):** Faafetai i lau Afioga i le Fofoga Fetalai mo le avanoa. E momoli foi le agaga faafetai i le paia o le Maota i faiga malologa foi atonu ua maua se faasiliga malosi i le paia maualuga o le Maota i nai itula foi ua tuanai, o lea ua toe aemalo mai le Maota aua foi le faaauauina o galuega. E moni lava le saunoaga a lau Afioga o lea foi ua maua le faasiliga malosi e Taitai o le atunuu.

Ua manatu foi e agai tonu se manatu e tusa ai foi o lenei Tulafono Tau Faaofi ona o lona taua. E i ai foi le manatu o lenei usugafono, a taua foi se Tulafono e ao foi ona faali ni lagona ma ni manatu aua foi le uiga o le tatou Tulafono Tau Faaofi e pei ona opea nei i luma o le Laulau a Fono. Faafetai i

lau Afioga i le Fofoga Fetalai, faafetai foi i lau Afioga i le Minisita ma le Matagaluega mo le toe aumaia foi o lenei Teuteuga i totonu o le tatou Maota. E talitonu foi i le vaavaai i ai faa-sui usufono e tau foi ma le Afioga i le Minisita ma le Matagaluega i le faatulagaina ona o nisi foi o finagalo faalia o le Maota. E le faigofie foi le galuega, ae manatu foi lou nei sui usufono, o le uiga lava lea o le tatou tiute o Taitai o le atunuu, aemaise foi i le faatagaina o le faitauga faalua i totonu o le tatou Tulafono Tumau. O le taua foi o le Tulafono e moomia ai foi ni fautuaga po o a foi ni manatu e faalia ona o lea ua aumai lenei Tulafono Tau Faaofi taua.

Lau Afioga i le Fofoga Fetalai, e puupuu lava foi se manatu, talu ai ona o le tatou Tulafono Tau Faaofi, e pei o lea e agai tonu lava i le faauigaina o upu. Ou te iloa foi e le faigofie lea vaega i le tatou silasila foi ma le vaavaai ona o le faauigaina o upu. Ou te talitonu foi ua oo lava i ai nisi saunoaga, a o lou nei lava sui usufono, i le upu tautua lea e i totonu o le Tulafono Tau Faaofi i lona faauigaina ma lona faaupuga, ua matua malie atoatoa i ai lou nei sui usufono i le faaupuga ma mea uma lava lea ua i ai, e oo foi i le nuu o lea foi ua ou vaavaai i ai faa-sui usufono o lea foi ua manaia. Ae na ona ou faatepa lau Afioga i le Fofoga Fetalai ma le paia o le Maota i sou lava manatu i ai, aua o le uiga lava o lenei Tulafono Tau Faaofi, e pei e fuafua agai i sui faatutu mo le Faiga Palota. Ona ou taumafai lea e faafaigofie se manatu ina ia vave foi ona malamalama mai se uiga o lou foi tulai atu, i le upu lea tautua po o le service, i lau vaai i ai, e pei ona ou fai atu, ua manaia, talafeagai ona o lea ua i ai uma i totonu pulega faalenuu, o le lotu, o mea uma ia faatautua o lea ua manaia o lea ua manino i le tautua po o le service. A tuu mai la i sui faatutu, o lona uiga e aofia uma ai lava tatou e 49 tatou sui faatutu i le faauigaina o le upu lea tautua. A tuu mai i le upu nuu, o lau foi lona vaavaai i ai, faauigaina, o i tonu lava lea e faatauaina ai suafa matai ma mea e matai ai sui taitasi. I lau vaai i ai, o lea foi e aafia uma ai lava tatou Nofoa e 49 i le faauigaina o le upu lea o le Tulafono Tau Faaofi lea e pei ona tatou i ai.

Ona oo mai loa lea i le upu lea o le tautua i le nuu, manatua foi o lea e i luga o le tautua nuu, e oo mai loa i le tautua i le nuu, o le (a), ua 47 sui, a o le (b) ua lua. E pei o nai mea la na o lea e tau faamalamalama ai sou taofi, aua o le uiga lava lea o tatou nei o Taitai, tatou te silasila ma tatou faufautua foi i le Malo ma tatou Tulafono, e pei o i tonu lea e mafua ai se manatu ua 49 i le tautua, 49 i le nuu, ae oomai loa i le tautua i le nuu ua 47 le (a), ae 2 le (b). E pei o le (b), lea e pei e lagalaga ai le tele o finagalo, o lea foi ua maua finagalo o le Malo ma le finagalo o le Tamaitai Minisita ma le Matagaluega. E le mafai ai lava ona tuua le matou faaleo atu ma le agaga e avatu ai pea leaga o le Maota e talanoaina ai tatou Tulafono.

I le vaavaai la a lou sui usufono e pei o le (b) la lea e na o le toalua lea ua ave ai le fesoasoani. E pei o le agaga lona o lea e tau vaavaai i ai faapena, e pei ona maua foi i nisi o saunoaga analeila, o i tonu lea e pei e tilotilo i ai i le pito foi lea e tutusa uma tagata i le Tulafono, sa tatau foi ona 49 le (b). Ioe. E pei o le agaga lona ae aua foi nei galo i lau Afioga i le Fofoga Fetalai faapea ma le paia o le Maota, e i ai foi le isi vaega taua o lo o i ai totonu o le tatou Faavae, o le aiatatau o le saolotoga foi lea e fegasoloai ai ma nofomau, o lona foi e i totonu o le tatou Faavae lona vaega. O itu uma na i le tilotilo i ai ma le vaai. A tuu ifo loa i le (b) ua faamalieina le toalua ae le faamalieina le 47. E pei o le uiga tonu lona i le vaega lea o le saolotoga feoai ma nofomau, o le tasi lona o vaega taua o lo o i totonu o le tatou Faavae. E pei o i tonu lea e i ai

se agaga o lou sui usufono ina ia faailoa atu foi le manatu faapena. A na faapea e 49, 49, 49 ia ua manaia, ua uma le case. E pei o le ituaiga manatu lena ua ou manatu e faailoa atu, e na o le lagalaga ae o le a lava le mea e i ai le position a le Malo, o le mea lena o la foi e silasila e pei ona saunoa le Afioga i le Palemia i lenei taimi.

Na pau lava lou popolega, aua foi le faamalieina lenei taimi ae afaina ai le tatou lumanai. Ae o lau lena vaavaai ma lau foi lea faauigaina. O le fautuaga foi lea ua avatu o lea ua manaia le faamatalaina ae pau lava le mea, o lea ua ou faailoa atu mafuaaga e mafua ai foi ona eseese finagalo. Ma le faaloalo lau Afioga i le Fofoga Fetalai.

**FOFOGA FETALAI:** Malo faafetai, short and sweet, very comprehensive. O le lauga lena a le motu tele i Salafai. Ia, o le a taumafai mai le Matamatagi, le sui usufono mo Aleipata Itupa i Luga, tulai mai e aumai se matagi agi malie i le Maota i lenei itula o le afiafi.

**Tofa FAGAAIVALU KENRICK SAMU (Aleipata Itupa i Luga):** Faafetai lava i lau Afioga i le Fofoga Fetalai e tusa ai foi ma le avanoa se i taumafai atu ai foi se sao puupuu o lenei Itumalo o Aleipata Itupa i Luga e tusa ai foi o lenei Tulafono Tau Faaofi ma ona Teuteuga.

Lau Afioga i le Fofoga Fetalai e pei foi lava o mau sa faalogologo i ai i le taimi ua sola i nisi foi o sui usufono, o le ala i le pule o le tautua. E talitonu foi lenei Itumalo na tatou ola mai foi i le Maota o le atunuu o le tautuaina o nuu ma itumalo. E momoli atu ai le faafetai tele lava a lenei itumalo i lau Afioga i le Tamaitai Minisita, o le Loia Sili aemaise o le aufaigaluega i le toe liulalauina o lenei Tulafono aua a fua i ai le tautua o le tautua o le monotaga tolu tausaga. E iai le taofi ua matua tatau ma onomea lenei teuteuga ma o se teuteuga foi e iai le talitonuga ua leva na tatau ona faatino e le Maota lenei. E faafetai i lau Afioga i le Minisita ma le Malo e tusa ai foi ma...aua o le mo sina faaitaiga lava i matou i tua e iai le matai la e nofo i Ausetalia a o la e fai lava le monotaga ola i le matou nuu ae pei ua lemafai ona o i le palota aua seiloga e tolu tausaga e nofo ai iinei i le tatou atunuu ae pei o i latou na o le matai i le 80 ona agai mai loa lea nofo ii i Apia e pei o le tulaga na ua faanoanoa i ai ona ua lalata loa i le palota ae agai atu loa e fia tauva ma fia o a o le mea taua i lenei sui o le tautua. O le tautua i le nuu, tautua i le lotu ae faafetai tele i lau Afioga i le Minisita mo nei teuteuga ma e faamanuia foi lenei itumalo i le tulafono lenei. E na o le pau lava le isi vaega taua e manaia foi pe a tuu i ai i totonu o le tulafono lenei i sui nei e fia tauva e manaia pe a faapea, ia i ai ma ni tou nofoaga tumau i nuu ma Itumalo. E pau lava le mea lea e pei e maitau i sui nei e leai ni fale i tua, ia e pei o nai vaega ia pe a tonu e iai se taimi, atonu e momoli atu ai le faafetai tele lava i lau Afioga i le Fofoga Fetalai mo le avanoa e faafetai ai pea le Afioga i le Minisita.

**FOFOGA FETALAI:** Faamalie i le sui o lea o lo o fia ui lavea atu Lealailepule Rimoni Aiafi i lau saunoaga. Sei tulai mai Lealailepule.

**Tofa Lealailepule Rimoni Aiafi:** Lau Afioga i le Fofoga Fetalai, o lea ou te matau i le sagisagi fiafia mai o le Afioga i le Alii Faipule e lagolago le Tulafono ma ou te talitonu ua fesoasoani tele le Tulafono i lana palota i lau

faalogologo atonu o le a le qualify ai i si sui ia latou te tauva, e pei o lau faalogologo atu lea ma le faaaloalo lava.

**FOFOGA FETALAI:** E leai e le o taua e le sui se suafa a se i si sui o faapena ae tulai mai e faaiu mai le saunoaga.

**Tofa FAGAAIVALU KENRICK SAMU:** E leai, o lau uso a faipule ma te tuaoi i Vaitele a o le tulaga e pei ona saunoa le sui mamalu e leai, o latou e fia agai atu. E na o le pau le mea e faataua i le sui nei o le tautua, o le tautua matavela, tautua i nuu ma Ekalesia mai lava i le laiti seia ave ma matai. E pei o le agaga lea lau Afioga i le Fofoga Fetalai e momoli atu ai le faafetai tele lava i lau Afioga i le Minisita e tusa ai ma lenei Tulafono. Pau lava o lea atonu foi o lea sa taua foi e nisi o sui faipule e leai ou te tatalo atu i lau Afioga i nofoa tu taulaga, se faamolemole aua le tauanauina matou palota taatia pea leaga o la ua valaau atu matou tagata, fai atu i ai aua, ae a avatu ni faamanuiaga talia ae aua le liliuina outou palota.

**FOFOGA FETALAI:** Ua alu lenei aso o tatou faasea ia Maualaivao a o lea ua uma ona tautino Maualaivao e leai lava se mea e tasi e na o le faamalamalama le mea la e agai ai lana komiti. Sei tulai mai Maualaivao

**Afioga Maualaivao Pat Ah Him:** Faafetai lava mo le avanoa i lau Afioga i le Fofoga o le Fono o le taua ia o saunoaga nei aua e faamalamalama ai mea o lo o pogisa ai, ae ou te faaitete lava e toe faamalamalama se mea e pei o le ..... i le fono lea sa tatou i ai le taimi ua sola, na uma loa ona ou faamalamalamaina le Tulafono, feei loa ma sui ma tau fono latou Itumalo e aua le liliuina latou palota ae leai se agaga faapena. O lea foi e lagona lava le faanoanoa ona e pei e tautuai faapea ua o tauanau, e leai e matua leai lava se agaga faapena a Maualaivao, e faatamalii lava ona fai. E faailoa atu i le sui mamalu e leai se agaga faapena ma le faaaloalo.

**FOFOGA FETALAI:** Malo faafetai, sei tuu atu le avanoa i le Afioga i le Alii Palemia.

**Susuga Hon Tuilaepa Fatialofa Lupesoliai Aiono Neioti Sailele Malielegaoi:** Lau Afioga i le Fofoga Fetalai e na o le pau le mea lea ou te tulai atu e ave le faamalo i le Afioga ia Maualaivao i le tele o tausaga o tulai mai i totonu o le Maota lenei faatoa tau lava lea i se sui ua fefefe ai le toatele o le Maota ma ua lemafai lava ona taofiofia ua talau lava i luma iinei ae amuia foi Maualaivao, ua lava a lana campaign lea e tosina ai tagata e palota i ai ona o lea ua latou iloa e matua toa lava. O lea ua tei ai lava ua palaai fua i ai isi sui ma tautau fua lona suafa.

**FOFOGA FETALAI:** O le maitau a le Itu Faleata lea o Santa Clause moi lava lea ua alu atu.

**Tofa Lealailepule Rimoni Aiafi:** Lau Afioga i le Fofoga Fetalai, o lea ou te fesili i uso a faipule po o le a se fesili i si ou uso a faipule pe o le a se lipoti a ona aiga, pe na avatu ni latou ulo ma ni latou falai.

**FOFOGA FETALAI:** Ia faaiu mai le saunoaga le sui usufono mo Aleipata Itupa i Luga.

**Tofa FAGAAIVALU KENRICK SAMU:** Lau Afioga i le Fofoga Fetalai e momoli atu le faafetai tele i lau Afioga e tusa ai foi ma le avanoa.

**Afioga Maualaivao Pat Ah Him:** Lau Afioga i le Fofoga Fetalai, leai e faamalulu atu i le paia o le Maota i lou tu soo atu, ae paga lea e tatau lava ona ou tu atu leaga o faamatalaga e sau e lagona e le atunuu. Ioe. O lea e tau nei mea, e pei ona ou fai atu foi i le sui usufono mamalu o Faleata Sisifo e te soso mai, ua e tau tele mai i le papau e iu ina e paulia. O le mea lea ua ou vaai i ai, a e soso foi i le loloto ua e malemo foi. O lona uiga ua e le iloa le mea a fai. O le mea lea vaeatu lava le paia o le Maota, a faapea ua e lagona lou vaivai, ia faasee i tua. O lou fia malosi e te le au i le aso o le tausinioga. A o le agaga lava ia te au ou te faamalosi lava, ou te tau lava i le sini o le faamoemoe. Ia, ma le faaaloalo, e leai ni na mea o feaveaia, o na mea pe a faaigoa pei ni auupega foi ia. O mea na e fai ai kuka ma mea faapena, ae ta fefe ailoga o e foaia se mea ma se tagata. Ma le faaaloalo lau Afioga i le Fofoga Fetalai.

**FOFOGA FETALAI:** O le mea la lea na ou fai atu ai aua tou te taulagalaga, ia lea la ua agai mai Maualaivao e le o se tulaga leaga. Do what you can do, that's the best ability e serve lou itumalo, la'u uma i ai mea e talafeagai i le taimi faatulafono. Ae a ta loa le logo faaletulafono, taofi uma mea e tusa ai ma ala o le tulafono. A o lau lava tautua i lou itumalo, fai, e le tuua e leai se tuaoi o mea lelei e te agai i ai. O se ua sulu atu ia te oe ua faaetonu se falai po o se mea faapena. Ia, malie ia le sui usufono mo Faleata Sisifo.

**Tofa Lealailepule Rimoni Aiafi:** Leai, o si ou uso. Ina ua ma feiloai, e te iloa oe ina ua iloa e le Toeaina ua ou le alu i le urban, se e ifoifo mai si Toeaina. A o lea ua ou vaai atu pei ua tau cheeky, Maualaivao se faafetai i le Atua ou te le o alu i le urban. Na pau lava lena o la'u tala, ae aua le toe suia lou mafaufau. Ma le faaaloalo lava.

**FOFOGA FETALAI:** O le tala foi a Maualaivao ia te au, ua e sola. O le faasaoga lena o le saunoaga a Maualaivao, ua manatu ua vevela i i le urban. Ia e i ai se isi mea? Tulai maia le sui usufono e faaiu mai le saunoaga.

**Tofa FAGAAIVALU KENRICK SAMU:** Ia e momoli atu le faafetai tele i lau Afioga i le Tamaitai Minisita aemaise foi o le Loia Sili mo Teuteuga o lenei Tulafono Tau Faaofi. Ma le faaaloalo lava faafetai.

**FOFOGA FETALAI:** Malo saunoa i le sui usufono mamalu mo Aleipata itupa i Luga.

Tulai mai se tasi o sui usufono mo Vaimauga Sisifo, Tofa Lenatai Victor Faafoi Tamapua, o lea ua avanoa le Maota mo lau saunoaga.

**Tofa LENATAI VICTOR FAAFOI TAMAPUA (Vaimauga Sisifo):** Faafetai i lau Afioga i le Fofoga Fetalai mo le avanoa. E fia faamau foi le faafetai a lou nei sui usufono i le Afioga i le Tamaitai Minisita aemaise foi o

le Matagaluega e tusa ai foi ma le Teuteuga o le tatou Tulafono Tau Faaofi. E fia avatu foi se manatu vaivai a lou nei sui usufono e tusa ai foi ma le Teuteuga ona o lo o aafia foi lenei itumalo.

Lau Afioga i le Fofoga Fetalai, e le umi foi. Na o le pau lava le vaega lea sa fia faaoo atu ai se faamatalaga ona sa faalogologo atu ma le totoa, sa faapea mai nisi sui usufono mamalu e faapea, e faapito le Teuteuga o le Tulafono Tau Faaofi lea. O le fesili la i lau Afioga, e faapito la ia ai? Ia, le itumalo pele o Vaimauga Sisifo ma Vaimauga Sasae, ia o Vaimauga lava lea. O tatou tonu lea ua to mai i ai le alofa faapito o le Tamaitai Minisita, le Afioga i le Sao Faapito. O lea ua tatala e le Teuteuga lea le isi avanoa mo se matai o le tatou itumalo e tauva ai i le Nofoa lea Tu Taulaga i Sasae pe a faapea o lo o e nofo i se fanua tumaoti.

Vaimauga e, e le o le ula lea o faigamea? I le maea ai o le faiga filifiliga i le tausaga fou, ae toafa matai Vaimauga e faaulufale mai i le Palemene. Lau Afioga i le Fofoga Fetalai, faafetai mo le avanoa faamanuia mai le Atua i taualumaga o totoe o le tatou Fonotaga. Faafetai.

**FOFOGA FETALAI:** Malo saunoa i le sui usufono mamalu. O le taimi lava lenei o lauga sue ai, ioe. Ia, ua matau atu e le o toe i ai se isi e toe fia saunoa, o le a lafo atu loa le avanoa i le...

Oi, ia malie lava, malie se tasi o sui usufono mo le Palota Taitoatasi o le a faamulimuli ia te oe ua alu le aso lenei o vavao le Maota ia te oe.

O le a avatu le avanoa i le sui usufono mo le Vaa o Fonoti ona tuu atu ai lea o le avanoa i lau Afioga ona faaiu mai ai lea e le Taitai o le Itu Agai.

**Afioga TIALAVEA FEA TIONISIO SEIGAFOLAVA (Vaa o Fonoti):** Faafetai i lau Afioga i le Fofoga Fetalai mo le avanoa ua tuu mai i lenei itumalo e fai atu ai se manatu aua le Teuteuina o le Tulafono Tau Faaofi.

E talitonu le manatu lau Afioga i le Fofoga Fetalai, o a ni manatu ma ni lagona i le Tulafono Tau Faaofi lenei, ua leai se taimi e mafai ai ona toe fai se isi Teuteuga ua uma le Paeaiga lenei.

Ou te talitonu o le tausaga lea ua mavae sa ou lauga ai i le Tulafono lenei o Faiga Palota ua tatau ona toe re-draft atoa lava le Tulafono Tau Faaofi lenei. Atonu o se faiga lea e tatau ona fai i le isi Paeaiga aua e le mafai ona fai i le Paeaiga lenei. Atonu foi o Teuteuga nei o le a mafai ai ona toe faasaosao nisi faaletonu o lo o i ai i le Tulafono Tau Faaofi lenei talu mai le 1963.

O le agaga la ma le faamoemoe lau Afioga e tauala atu i lau Afioga i le Fofoga Fetalai, a taugā le Tamaitai Minisita i le Teuteu o le Tulafono Tau Faaofi o lenei ua faalima (5) ona Teuteu aemaise foi le Afioga i le Loia Sili ma le Komesina ua amata ona sinasina lona ao i le lima o Teuteuga o lenei tausaga. E le tele lava ni manatu ae lagolagoina le Teuteuga ua i ai, se i aulia le tausaga fou po o lea Paeaiga e toe liuliu ai le Tulafono. Atonu e uma ifo ona liuliu ua leai isi sui usufono. Ia manuia le afiafi lau Afioga.

**FOFOGA FETALAI:** Malo faafetai, tulai mai se tasi o sui usufono mo le Palota Taitoatasi.

**Afioga MAUALAIVAO PAT AH HIM:** Faafetai mo le avanoa lau Afioga i le Fofoga Fetalai. Ou te talitonu foi i lenei itula e lagona lava le popole ma le faatauvaa i le tu soo atu, e le masani ai lou sui usufono, e pei ou te

matamuli e tulai soo atu. Sa ou faatalitali ona ou te faaaloalo tele i saunoaga a sui usufono mamalu o itumalo ona ua fetau lava lenei foi Paeaiga ua ou ulufale mai ai, ae ua i ai foi le itumalo fou lea o Nuu Tu Taulaga. Faafetai tele lava mo saunoaga matagofie uma lava e tusa ai ma lenei Tulafono Tau Faaofi. E liuliugata ma o lona taua lea.

Ou te momoli atu le faafetai tele lava i le Afioga i le Palemia e tusa ai ma le faamalamalamaina o lenei Tulafono, faafetai foi le faamalosiau. aemaise foi le Afioga i le Tamaitai Minisita e ana le Tulafono Tau Faaofi. Ou te talitonu ua le faapito manu ia Tasi, ae ua talolua lava Tuna ma Fata e tusa ai ma lau vaai. Ua le faapito i se auaunaga foi lea faapea i se nuu e te matai ai, a o lea lava po o fea lava e te alaala ai ua mafai lava ona maua le avanoa ma tatala. E pei foi ona saunoa se tasi o sui usufono mo Vaimauga Sisifo e tusa ai ma ia avanoa lelei. Ou te talitonu o se Tulafono Tau Faaofi taua tele ma ou te fiafia i ai ona o lea ua aumai suiga nei, e leai se avanoa ae ua avanoa uma tagata i le tauvaga lenei i lenei itumalo.

Ou te lagolagoina tele le Tulafono Tau Faaofi, ma e le toe umi sau faamatalaga i ai e tusa ai ma lea vaega. Ua taumafai lava e avatu foi se sao e tusa ai foi ma sui usufono mamalu o lo o lauga mai aua e tele lava nisi saunoaga e oo foi i matai, ua fesiligia foi matai o lo o tatou seei ai nei. Pe na fai i nuu ni matai, ou te talitonu lava ailoga e leai se sui usufono mamalu e le i faatinoina i le auala faaleaganuu talafeagai sona matai.

O le nuu foi lea ou te matai ai i si o matou nuu o Malie, e te le mafai ona e saofai i totonu o le fonu a le nuu pe a le usu le nuu e faia lou matai. Ioe, o le aganuu lena ma le faa-Samoa. Ia e moni lava la o lea ou te nofo i le mea lea ou te i ai nei ae o le tautua o la e faatino le tautua. O le avanoa foi la lea e agatutusa ai e tusa ai ma le aiaiga o lea Tulafono Tau Faaofi, o lea foi e i ai le avanoa e tautua i le nuu, tautua i le mea o lo o e nofo ai, ia faapena foi i Ekalesia. Ia a o isi ua faatino latou tautua i le o, maua atu i le i si falesa, maua atu i le i si falesa, ua faapena. E te i lava le faifeau o lea Ekalesia ua maua atu i ai le sui usufono ae le masani ai. A o le mea latou, o le tautua lava i Ekalesia o le mea taua lena e aunoa ma se faatilo masae i se mea e manao i ai.

Ma le faaaloalo tele i le faafofoga mai a lou Itumalo Tu Taulaga, ia o lea ua outou faafofoga mai i le taua tele o outou ma le itumalo. Ua tele saunoaga ma timaiga lelei ma suiga. Aisea? E mamafa ia i latou le faaleleia o le Tulafono Tau Faaofi e tusa ai ma aiatatau a tatou. Ia o le agaga moni lea, e momoli atu ai le faafetai i lau Afioga i le Tamaitai Minisita e tusa ai ma le Tulafono Tau Faaofi, aemaise foi le lagolagoina. Sa lagolagoina atoa lava e le tatou Palemene lenei ma pasia. Ia ua i ai lava aia a le tagata e tuu i ai e tusa ai ma lenei foi Tulafono Tau Faaofi. Ma ou te toe faapea atu ai, o a foi ni tuuaiga o lo o faapea mai o lo o ou faamalosi ni tagata e fia resitala, o lena ua uma ona ou tautala atu ma le faaaloalo. E faamalulu atu foi i ni sui usufono mamalu o afaina po o manua foi o latou finagalo e tusa ai ma le matou galuega o lo o fai. O le galuega lenei o le tauologologo ma momoli le mau taua i le aiatatau a le tagata, aemaise le tataua ona resitala ma palota. E taua tele le resitala o le tagata i le mea o lo o alaala ai aua e pei foi ona outou silafia. O lea lava ua tatou silafia ma malamalama i ai, o nisi o le tatou motu i Salafai lea ua alaala i Apia i Nuu Tu Taulaga. Ia o lea ua i ai le avanoa, a palota i le mea o lo o alaala ai, e faaleleia ai foi mea o lo o latou nonofo ai, e faapena ma auaunaga

a le tatou Malo e tusa ai ma ona tagata, ae o lena e i ai le faitalia i le tulaga lea.

Lau Afioga i le Fofoga Fetalai, o lau faamatalaga lenei ma lau fesoasoani atu e tusa ai ma le tatou mataupu. Ae faafetai tele i le Afioga i le Palemia ma le tatou Malo, aemaise foi le Afioga i le Tamaitai Minisita e ona le Tulafono Tau Faaofi. Manuia lava le tatou Fonotaga. Faafetai.

**FOFOGA FETALAI:** Malo faafetai.

**Afioga Toeolesulusulu Cedric Pose Salesa Schuster:** Lau Afioga i le Fofoga Fetalai.

**FOFOGA FETALAI:** Oi sole, ia o lea ua fai atu le faaiuga a o lea foi ua outou toe tulai mai.

Ia tulai maia o le a avatu le avanoa mulimuli lea le sui usufono mo Aiga i le Tai ma le sui usufono mo Aana Alofi Nu.3 ona tuu atu loa lea i le Taitai o le Itu Agai. Se e ava tele atu ona o le Tulafono Tau Faaofi taua.

**Susuga IFOPO MATIA FILISI (Aiga i le Tai):** Faafetai i lau Afioga i le Fofoga Fetalai, e leai e laitiiti lava se manatu. E leaga o lea ua lauga le Vaa o Fonoti, ia e faapea foi ona avatu se motugaafa foi a Aiga i le Tai, le Feagaiga. O lea lava e nofonofono ma taputapu atu i outou faiva, ae ese le faigofie o le Teuteuga o lea Tulafono Tau Faaofi. E le o se mea faigata i se matai e momoe faatasi ma lona nuu, momoe faatasi ma lona itumalo, fono faatasi. E faigofie e leai se mea faigata, ioe, malamalama lelei, tautua. O a uma lava mea ua aumai i le Tulafono lenei, e faigofie ua malamalama lelei i ai. Ae o si au tala lea laitiiti lava e fia faamalamalama ai, ona sa ou faalogologo i saunoaga a le Maota nei i nisi o saunoaga a sui usufono mamalu e faapea, pe ou te piama foi i le sui usufono mo Aana Alofi Nu.1, Afioga Leaupepe Toleafoa Apulu Faafisi i le mea lava lea o le maua o tonu, e maua i tua, e le maua iinei i le taulaga, aemaise lava mea ia o saofaiga i alii ma faipule o nuu taitasi. Malo lava faafetai. A o sau faamatalaga, ona o le tele foi o tagata o lenei itumalo o Aiga i le Tai o lo o faapea ona sailiili matagi ma agai mai i le taulaga, pei o le nofoaga lea e i ai Itumalo Tu Taulaga pei ona faapena ona luga ma lalo ai le Teuteuga o lenei Tulafono Tau Faaofi.

Ona faapea lea o se faamatalaga, e leai, e toatele lava nisi o le itumalo lea. A o lau faalogologo atu i le faapea mai, o se tala foi lea ua avasese e sui usufono mamalu o itumalo faapea foi ma Savaii o lo o faapena ona agai ma ii nofoaga nei ae faapea ua le mafai ona toe palota atu i tua. O le mea lea ou te toe tulai atu ai e faamalamalama, pe faapea foi se faamatalaga faigofie, leai o la e lava e i ai lo outou avanoa. Sui uma o le tatou itumalo o Aiga i le Tai, pule oe i lau aiatatau, o la e lava e i ai le avanoa ma lau pule e pei ona i ai le Tulafono, e te palota i Nu Tu Taulaga, pe e te palota foi i tua i le mea o lo o masani ona e palota ai i Aiga i le Tai.

E pei o le agaga lea ua ou toe tulai atu ai ma le faaaloalo lava lau Afioga i le Fofoga Fetalai, ina ne i sese ai itumalo lea e agai mai tua ma nonofo i nofoaga nei i se faamatalaga. Ae le o faamaonia foi, e faamalulu atu ai foi i sui ia o le Komiti o le Vaega lea Tu Taulaga. Ma lou faaaloalo lava. Ia manuia tele le Fono lau Afioga.



**FOFOGA FETALAI:** Malo faafetai. Toeolesulusulu, tulai mai le sui usufono mo Aana Alofi Nu.3.

**Afioga TOEOLESULUSULU CEDRIC POSE SALESA SCHUSTER:** Faafetai lau Afioga i le Fofoga Fetalai mo le avanoa. O lea ua talitonu ua tele lava o manatu sa i ai ua uma ona faaalua e le tele o sui usufono. Na pau lava le vaega lea ou te toe tulai atu ai lau Afioga i le Fofoga Fetalai, ona atonu e fia maua se faamalamalamaga mai le Afioga i le Tamaitai Minisita i le vaega (b) lea i le tautua i le nuu lea e faapea e faapito i sui Tu Taulaga, ona o lau faitau atu i ai, e tusa pe e te nofo e le o faailoga mai, e tatau ona e tautua i le vaega o lea o le a e palota ai. Mo se faataitaiga, e mafai ona e tautua i se aulotu po o se aulakapi po o so o se kalapu e fai i ai lau tautua lea i le isi po o le urban west ae e te sui palota i le urban east. O le tele lava, o lea e tatau ona e tautua i totonu o le itumalo. Peitai ane lau Afioga, o lea na ona faalautele mai i i, so o se vaega o Itumalo Tu Taulaga. O lona uiga e mafai ona e candidate i le east, ae fai lau tautua pe e te serve i le west ona e le o specific mai i i, e tatau lava ona e tautua agai i le urban seat lea o le a e i ai, lea e fia maua i ai se faamalamalamaga ona o lau faitau lea i ai, atonu e ao pe i ai se teuteuga e toe faia i ai, ou te talitonu e ao ona faamaoti, ina ia serve lava ma tautua i le urban seat lea e faamoemoe e i ai, pei foi ona i ai i itumalo uma ia, Territorial Constituencies. Faafetai.

**FOFOGA FETALAI:** Malo faafetai le faamanatu.

Ia, tulai maia lau Afioga i le Taitai o le Itu Agai e faaiu mai saunoaga ona avatu loa lea o le avanoa i le Tamaitai Minisita e tulai mai e tali mai.

**Afioga Hon PALUSALUE FAAPO II:** Faafetai. Ou te tulai atu foi ma le faaaloalo e fai sina sao i lenei Tulafono Tau Faaofi Taua. E laitiiti, a o le tele ia o lona aafiaga, lea foi e taumafai sui usufono mamalu uma o le Palemene e saunoa i ai i le Tulafono Tau Faaofi, ona e aafia uma ai lava tatou, ae le gata i lea o nai sui faatutu o lo o fia tauva mo le tofi faipule, e aafia uma ai lava i le Tulafono Tau Faaofi lenei. O le ala foi lea lau Afioga i le Fofoga Fetalai, pe puupuu lava le sao o le sui usufono, ae aafia tele lava le Faiga Palota i le Tulafono Tau Faaofi lea.

O le mea lea lau Afioga i le Fofoga Fetalai, o lea foi e taumafai atu ai lenei Itu, e le o se tulaga faapea e tetee i le Tulafono Tau Faaofi, a o le silasila totoa i nisi o vaega e aafia ai le tatou atunuu pei o le Tulafono Tau Faaofi lenei.

O le aafiaga o le atunuu, i nai sui foi nei e le qualify, e tolu tausaga talu ona fai lana monotaga. E pei o le tulaga lena, e le logona iinei i le Maota o latou leo, a o le matou tiute lea, ina ia faailoa le tulaga o i ai nai nei sui o le a le mafai ona o. Aua o le upu moni, o lea e fialia nisi sui usufono aua o lea ua iloa o le a le mafai ona o nisi o sui usufono o lo o taumafai e o i o latou itumalo.

Ona ou fesili lava lea o au ia, pei ona laga atu e lenei Itu, o fea o i ai le tatou faa-Temokarasi? Aisea ua tuu i ai le tolu tausaga? Aisea? O le tolu tausaga lea e puipui ai tatou. Na pau lava lea o le mea o lea e taumafai atu ai le Itu lenei, aele faapea o se tulaga... o lea lava e gasea lau Afioga ma le Matagaluega e tau teuteu Tulafono, ina ia faaleleia atili ai tatou Faiga Palota. A o aafiaga la ia pei ona ou fai atu, o le toatele ia o nai sui o le a le mafai ona tauva ona o le teuteuga lenei. E ui lava ina faapea e le paleni i la foi uso i le

Palota Tu Taulaga, a o tagata aupito sili ona aafia, o sui o le atunuu o le a le mafai ona tauva i lalo o le tolu tausaga lea. O le auga atoa lena o le taumafai atu o lenei Itu, o le tolu tausaga lea lau Afioga i le Fofoga Fetalai. Pe aisea ua tuu ai i le tolu tausaga. O lea ou te malamalama, o le tolu tausaga...

**FOFOGA FETALAI:** Malie lau Afioga i le Fofoga Fetalai, se i tulai mai le Afioga i le Minisita.

**Afioga Hon Fiafame Naomi Mataafa:** Lau Afioga i le Fofoga Fetalai, o le mea e fia faasao, ua tatou pasi mai le ogasami lea. E faamalie atu ia i le Afioga i le Taitai o le Itu Agai, o lea ua taatia le faaiuga a le Palemene e tusa ai ma le tolu tausaga e agavaa ai le sui tauva. Ae tatou talanoa ia i sia teuteuga laitiiti ua tuuina mai.

**FOFOGA FETALAI:** O le ala foi lea e tuu atu pea le avanoa, ae...

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** Lau Afioga i le Fofoga Fetalai, e i ai lava le mea lea e pei e foliga mai e mafua ona fai nei Tulafono o tatou, i le puipuiga o tatou. E le mafua ona fai ni Tulafono o le puipuiga o tatou, e tatau ona faamanatu atu pea i lau Afioga i le Taitai o le Itu Agai. E leai lava se isi e mafai ona puipui tatou. Aua foi o le talitonuga lea e i ai, o tofiga o tofiga mai le Atua. E i ai la se malosia e faapea atu i le Atua, “puipui mai matou i mea ia.” Afai e te talitonu i le mea lena, ona e manatua lea, e le i faia le Tulafono lena o le puipuiga o se isi. E ala ona fai Tulafono, ina ia faataoto taiala o e o le a tulai mai, o tagata e tautua i le itumalo e faatino le finagalo o le Atua mo le itumalo. O tatou uma lava o auauna, o meafaigaluega.

Lau Afioga i le Fofoga Fetalai, o le mea lena o lea e galo pea, e agai lava lauga o le puipuiga o ai, puipuiga o tatou. Alii e, tatou te le puipuia tatou, o le fesoasoani atu lena. Na o le tagata lava e le malamalama i talitonuga faa-Kerisiano e tata i mea na. O lau fautuaga i lau Afioga, o oe foi o le Tiakono. A e afio mai, taga mai lou Tiakono e te sau ma oe i totonu ae le o le tuu o le Tiakono ae e afio mai ese le mea e te ta ai.

**Afioga Hon PALUSALUE FAAPO II:** Lau Afioga, o le ala tonu lava lea o lea ou te tautala ai faa-Tiakono, e tutusa tagata uma, tutusa tagata uma. Aua o lea ou te fai atu lau Afioga i le Fofoga Fetalai, pe monotaga, pe leai se monotaga, pe tautua pe leai se tautua, o le tali lava e aumai e nuu ma itumalo, ioe. E leai e le nofonono lava le nuu ma le itumalo palota i le tagata e leai se monotaga ma le tagata e leai se tautua e faia. E leai, e palota lava le nuu ma le itumalo i le tagata o la e tautua ma fai le monotaga i le nuu. O le mea lena e ala ai ona ou le talitonu i puipuiga ia e aumai i le Tulafono Tau Faaofi aua o le tali o nei mea uma e tusa ai ma le saunoaga a lau Afioga i le Palemia...

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** Lau Afioga i le Fofoga Fetalai, e i ai foi le taimi e sao ai le tiapolo. A lea na faiaina ai si Toeaina o Pule Lameko ia te oe faatoa e taunuu mai? Ae sa faaoga le paoa o le tupe.

**Afioga Hon PALUSALUE FAAPO II:** E le o se tiapolo. A na o se tiapolo e le toe sau i Paeaiga e tele ia e i ai nei.

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** A foi aua e fealuai lava le tiapolo e le o mafai ona...

**Afioga Hon PALUSALUE FAAPO II:** E leai, e le o au o se tiapolo. E te fiu lava e taumafai....

**Susuga Hon Tuilaepa Fatialofa Auelua Lupesoliai Neioti Aiono Sailele Malielegaoi:** E fealuai lava le tiapolo e le mafai ona... O le agaga lava lena o le alii, e fai lava ma ave i Seoli, ae le mafai ona taofia i Seoli e alu ma sau fealualuai.

**Afioga Hon PALUSALUE FAAPO II:** E leai e le o se tiapolo. A na o se tiapolo, na o le tasi lava le taimi ou te sau ai i le Palemene lena, a o le valaauina a le Atua o le mea lena, e pei ona e saunoa i ai.

**Tofa Lealailepule Rimoni Aiafi:** Lau Afioga i le Fofoga Fetalai, o lea e saunoa le Afioga i le Palemia o le Tiakono. Lau Afioga, o Palusalua na au i Malua, o le faifeau. Ma le faaaloalo lava.

**FOFOGA FETALAI:** Ia faaiu maia lau saunoaga ae se i tuu atu le avanoa i le Afioga i le Minisita.

**Afioga Hon PALUSALUE FAAPO II:** Lau Afioga i le Fofoga Fetalai, e faamalulu i nai isi sui faatutu ma le latou aiatatau, o lea ua taofia i le Tulafono Tau Faaofi lea. E faamalulu i ai, aua a na faapea e silasila le Malo i nai tagata ia, semeamanu e toe tuu le Tulafono se i faaaau i le isi Paeaiga. Ia, ona pau lea o se sao. Ma lou faaaloalo lava.

**FOFOGA FETALAI:** Malo faafetai. Ia o le a avatu ia le avanoa se i talifuitau le Afioga i le Tamaitai Minisita e tusa ai foi ma mea sa laga i a outou lauga. Tulai maia lau Afioga i le Sao Faapito.

**Afioga Hon FIAME NAOMI MATAAFA:** Faafetai lava i lau Afioga i le Fofoga Fetalai. E avatu foi le faamalo i sui usufono mamalu o le Fono Faitulafono ona o saunoaga foi i luga o le Tulafono Toe Teuteu. Ma e pei foi ona masani a ii tulaga o tatou Tulafono e faafoe ai le tatou Fono, e pei o le tatou faatalanoaga lea, tatou te talanoa i luga o aoatetelega. E matau atu lau Afioga, pei o le tele lava o saunoaga e agai i fuaiupu faapitoa o le Tulafono Tau Faaofi e pei ona tuuina mai, atonu e toe maua ai la le isi avanoa i le taimi e faagasolo ai le tatou auiliiliga o le Tulafono Tau Faaofi.

Ou te manatu lau Afioga i le Fofoga Fetalai i le tulaga aoatetele, e mafai ona ou faapea atu o le Tulafono Toe Teuteu lena o lo o tuliloa ai le sini autu lea sa tatou faia ai le faaiuga i le Teuteuga (Nu.4) lea na faatulaga ai le tolu tausaga e fai ai le tautua a le sui tauva, po o se agavaa foi lea faaopopo.

Lau Afioga i le Fofoga Fetalai, i le talanoaina foi la o lena Toe Teuteuga o le tolu tausaga e faatino ai le tautua, o lea na i ai foi finagalo faaalia, e ao lava ona faamanino atili poo le a le uiga o le upu lea tautua. O lea la e i ai le tatou

Tulafono Tau Faaofi lea ua aumai e atili faamanino ai ma ua faauigaina ai upu ia, o nuu ma afioaga, o monotaga, o le tautua, o le nuu, o le tautua i le nuu ma tulaga faapena, e faamanino atili ai le vaega lea na tatou pasia i le tatou Tauaofiaga talu ai.

Lau Afioga i le Fofoga Fetalai, e matauina e i ai e e lagolagoina le Tulafono Tau Faaofi ma latou faapea mai, ua lelei lava lea ua manino atili ai foi le upu lea o le tautua. Ae i ai foi nisi ua saunoa mai e tetee, e faapea, e sili ai lava pe a na faapea e taatia ai lava i le taatiaga sa i ai, e faalautele ai pea le upu tautua.

A o le agaga lava ia mo so o se Tulafono Tau Faaofi, tatou te vaai i itu a ono luitauina se vaega o le Tulafono Tau Faaofi, aemaise pe oo atu i luma o le Faamasinoga, o le a mafai ona fesoasoani vaega eseese o le Tulafono Tau Faaofi e faafaigofie ai le faagasologa ma le faafoega o le galuega a le Faamasinoga. Ae le gata foi i lea, o le faatinoga o galuega a le aufaigaluega a le Malo, pe a faapea, o se mataupu e faasino lava ma o lo o i ai foi le malosi faaetulafono i tagata faigaluega a le Malo o lo o faafoeina Tulafono mai lea taimi i lea taimi.

Lau Afioga i le Fofoga Fetalai, ou te manatu ua oo i le Tulafono Faavae nisi o mataupu ua laga mai. Ou te manatu e le faasili foi sa matou faamatalaga o lea ua saunoa le Palemia. E talifuaitau atu i nisi o mataupu o lo o laga e sui usufono, ma momoli mai ai se mau, ua le talafeagai lenei Tulafono Tau Faaofi ma le tatou Tulafono Faavae, aemaise i luga o aia tutusa a tagata. Lau Afioga i le Fofoga Fetalai, sa fai foi le faamatalaga i le tatou Tauaofiaga talu ai ma sa toe faamanatu atu foi i Faiga Palota lava, na fai ai le faaiuga a le tatou atunuu, o le a faavae faiga o tatou palota i luga o le faamatai. O lea lava e taaina mai ai lo outou paia ma lo outou mamalu, e oo mai lava i lenei taimi, o le saofaiga lava lea o le Palemene lenei, o matai. Ma na faia i luga o se auala faa- Temokarasi, o le Pelepesite. Sa ave ai le fesili i le atunuu, pe o le a faapea ona tatou fai i mataupu tau Faiga Palota.

Lau Afioga i le Fofoga Fetalai, a tuu lava i finauga o lo o aumai ai finagalo o sui usufono, ua le tutusa aia a tagata e tusa ai ma aiaiga o aiatatau faavae. Ou te faapea atu ma lou faaaloalo lau Afioga i le Fofoga Fetalai, le paia e o le Maota Fono, e le tutusa. Aua a na faapea e le tutusa ma tatou o e mulimulitai i le faiga faa-Temokarasi o lo o i ai atunuu i fafo, e le na o matai la e nonofo i inei, e le na o matai. E tatau ona saofia mai i totonu o le Maota lenei tagata pe ua ausia le 21 tausaga pe a, tama, teine, o le matua, o le talavou. Ioe. Ae a? Na fai lava le tatou ioega. Na pupula lelei fofoga o outou tuua ma o tatou matua, fai le tatou faaiuga o Faiga Palota, o le faamatai. O lau tali atu lena i le finauga lea i le le tutusa. E le tutusa aua o le faavae lena lea na tatou sau ai mo Faiga Palota na o matai. E le faapea la e faamalieina le tulaga e na o matai e sao mai i totonu i inei, ae tatou toe tau aapa foi la i tua ma tau aumai aiatatau faavae, e finauina ai le mea lea. Aua o le mea moni lava lau Afioga i le Fofoga Fetalai, a tatou tuu lava i le faauigaina o le upu Temokarasi, e le tutusa.

Lona lua la lau Afioga i le Fofoga Fetalai. O lea lava e aumai le le tutusa i le va o sui tauva i itumalo faaalalafaga po o territorial constituencies ma tatou itumalo Tu Taulaga, o ni itumalo fou o lea faatoa faavae atu nei i le tatou Teuteuga lona tolu o le Tulafono Tau Faaofi o Faiga Palota. Ma o lo o momoli mai le le tutusa, i le tau o le upu monotaga mo itumalo faaalalafaga, ae faalautele le upu tautua i Itumalo Tu Taulaga. Lau Afioga i le Fofoga

Fetalai, e faigofie lava le tatou mataupu lea. O tatou Itumalo Tu Taulaga, o lea lava tatou te aapa atu e aumai pea le tofi o le matai. O lea foi na tatou faia i le isi Paeaiga i sui usufono mo Palota Taitoatasi, ua le toe sao mai i o latou suafa taulelea, ae ua tatou faatulagaina e toso mai, ina ia ave pea le faamatai lea na faavae mai ai a tatou Faiga Palota. O lea foi la, ua oo mai i le tatou Teuteuga, ua faamuta le lola o le Palota Taitoatasi a ua faavaeina o tatou Itumalo Tu Taulaga, o lo o tatou manaomia pea sui tauva e suafa matai. Ae i ai lona eseese. O le isi agavaa o lea e matilatila i Itumalo Tu Taulaga, e faasino ia i latou o e o lo o alaala i luga o fanua umia saoloto. Pe mafai ona tatou faapea, o ni nofoaga faitele.

Lau Afioga i le Fofoga Fetalai, e faigofie lava le mataupu. O le upu monotaga, e faasino i le matai ma lona faasinomaga i le nuu ma le pule a alii ma faipule. Ae le mafai ona tatou faia le upu lea o le pule a alii ma faipule i se nofoaga faitele, i e o lo o alaala i luga o fanua umia saoloto. E faigofie lava. E le mafai ona tatou faaaogaina le upu monotaga. O ai la e faia le monotaga? A faavae ni a tatou nuu fou? E leai. A o lea foi tatou te malamalama lau Afioga i le Fofoga Fetalai i le mea lava ua fia nei tausaga o tatou tilotilo pea i ai i o tatou tagata palota o lo o alaala i fanua nei umia saoloto, e tele lava i le talafatai o le taulaga po o fea lea e gaoioi agai i ai. Aumai le faasea a itumalo mavae o Vaimauga ma Faleata, aemaise lava Faleata. E tele le afaina o matou, ona o tagata nei, ona tatou fai lea o le fuafuaga, e tau ta vavae ese mai ai, ma lē afaina ai le pule ma le faamaopoopoga o nuu mavae ma itumalo nei.

**Tofa Lealailepule Rimoni Aiafi:** Lau Afioga i le Fofoga Fetalai..

**Afioga Hon FIAME NAOMI MATAAFA:** E le o faapea lau Afioga i le Fofoga Fetalai, o faapea atu o ai e sao, o ai e sese. A o mea lava o lo o tutupu mai i o tatou taimi...

**FOFOGA FETALAI:** O lea o le a uma ona avatu lea o le avanoa. O lea faatoa tali le Malo.

**Afioga Hon FIAME NAOMI MATAAFA:** E ao lava ona tatou fuafua ma fai i ai a tatou faaiuga mai lea taimi i lea taimi. Ma o le mea moni, o se faiga fou lea. A faapea mai foi ua faasea sui usufono i le tele o a tatou suiga, atonu o le uiga lava lea o se mea pe a fou foi se mea o tatou taumafai atu i ai. Sa tatou finau foi po o le a le tele e tatau ona i ai po o le a le laititi. E finau atu e lelei le laititi ona o se mea fou i Itumalo Tu Taulaga, ae finau mai, e leai e tatau ona tatala atu i le mea e tatau ona tatala i ai. Na fai lava le finagalo o le Maota, a ua fai lava a tatou faaiuga e fai a tatou Itumalo nei Tu Taulaga. O se tulaga fou e ese foi ona agavaa, ma o lea la e tau taofiofi pea lava le iumaea, i le i ai pea o matai ma le faatinoga o le tautua. A o le upu lava ia o le monotaga lau Afioga i le Fofoga Fetalai, e faasino lava i nuu ma itumalo mavae. E le mafai ona tatou faaaogaina le upu lena i nofoaga faitele. Lau Afioga i le Fofoga Fetalai....

**Tofa Lealailepule Rimoni Aiafi:** Lau Afioga i le Fofoga Fetalai, faafetai i lau Afioga i le Tamaitai Minisita. A o si vaega lava lea ua oo i ai le saunoaga i matai ia e nonofo i le taulaga. Manatua foi o le upu faa- Samoa ma le

aganuu o lo o saunoa i ai le Afioga i le Tamaitai Minisita, o le gagau o le aupolapola. O la e nofo i totonu o nuu mavae ae tatau la ona gagau mai lana aupolapola, fai ai lana monotaga i ina pe afai o lena. A o le upu faa-Samoa lena sa tatau ona faatino i le vaega lea, ia laugatasia ai tatou. E pei lava o le fesoasoani atu lena ma le faaaloalo lava.

**Tofa Aveau Tuala Lepale Niko Palamo:** Lau Afioga i le Fofoga Fetalai....

**FOFOGA FETALAI:** Tulai mai le sui usufono mo Faleata Sasae.

**Tofa Aveau Tuala Lepale Niko Palamo:** Ua saunoa le Minisita faapea o le monotaga e faasino i nuu ma itumalo mavae. Silasila foi lau Afioga i le Fofoga Fetalai, o le matai, o le matai mai le itumalo ma nuu mavae. E le o se matai i totonu i le vaega lea. O lea e fai mai le Tulafono Tau Faaofi, e tatau ona tautua le matai lea. E sao le Afioga i le Minisita, e le tautua i totonu i i leaga e le o se nuu mavae le nuu lea na matai ai. O la e tautua i le nuu la e fai ai lana monotaga. Afai e leai sana monotaga e faia i le nuu ae fai lana tautua i i, e le aoga lena matai. E le o se matai. E leai sana tautua i o i le matai. O le mea lena o lea ou te talanoa atu ai, e leai o le siosiomaga lena o le matai, e fai lana monotaga ma lana tautua i le itumalo, i nuu mavae.

**FOFOGA FETALAI:** O lea ua maua le... Ia, lafo atu i lau Afioga e faaii maia lau saunoaga.

**Afioga Hon FIAME NAOMI MATAAFA:** Lau Afioga i le Fofoga Fetalai, e mafai lava ona tatou fefaaliai lava taofi ma manatu, ae tatou malilie ia, ua lava foi ia suiga, ae tatou sauni ia mo le tatou palota. Ioe, sulu loa mea faipele ma tatou o loa, o lea ua taatia a tatou Tulafono. O le tali atu lea ma le faaaloalo lau Afioga i le Fofoga Fetalai.

*Na faaalua le agaga fiafia o sui usufono o le Maota i le maea ai o le Saunoaga Talifuaitau a le Afioga i le Minisita mo Faamasinoga ma Pulega tau Faamasinoga i le Tulafono Tau Faaofi o Teuteuga o le Tulafono o Faiga Palota (Nu.5) 2015.*

**FOFOGA FETALAI:** Aumai se tatou patipati tele mo le Afioga i le Tamaitai Minisita. E manatu ua faaifo le naaloa i ona lupe filimalae i lena Tulafono Tau Faaofi, o lea foi ua saunoa le Afioga i le Palemia, o le Teuteuga faaii lena o le tatou Tulafono Tau Faaofi, ona tatou alo loa lea i le faalagamaea. Ia loto tetele lo tatou Palemene, aua lava ne i i ai se isi e loto vaivai. Ia sagatonu le tagata i lona itumalo, aua le toe feoi. O le mea lena o lea e tupu ai nei le nunumi o mea nei e fai, ioe. Aua le tau faaosooso. O le agaga ma le faamoemoe, ua malamalama le finagalo o le tatou Maota. Sa tatou aumai avatu, ae tasi lava le auga, ia mamalu le faiga filifiliga a le atunuu. O le a le aoga tatou te omai ai, e le omai ni sui usufono e tafafao i le Maota. E o mai sui usufono ua filifilia mai, o sui usufono e tautua matapalapala, tautua toto, tautua le pao, e tautua moni i le itumalo, ioe. Afai o lea e faalogologo mai sui o tau o, ia outou manatua e le faigofie le saili o lou ala i Malo i le Fonousu a Samoa. Ma e le o toe mamao le isi Paeaiga, sauni e

amata nei ona e alu e fai lau tautua i le nuu. O le apoapoaiga lena a le Fofoga Fetalai. E le uma ai avanoa, a o le faavae lea ua faataatia, o le malu o le atunuu. O le malu lea o Samoa lea e taumafai atu le tatou Tulafono Tau Faaofi lenei. E le i ela le vaai a au nei i le Tulafono Tau Faaofi lenei, leaga sa ou Taitaifono ai. O le mea sili faafetai ua talia e le Minisita, se tasi lenei o aiaiga na aumai. E leaga e le tataua ona tatou o faatemeteme, e le tiutalaloaina le atunuu. O ai le tagata e tafao tafao alu atu alu? E le moni lea mea. A o le atunuu lava ia, o la e i ai le filifiliga faaletagata, latou te filifili mai Taitai. O la e faafogafoga mai nuu ma itumalo, o latou e pule, e pule i le filifiliga o tatou. A o le faamanuia ma le silasila i le lumanai, ua silafia e le Atua ē e toe foi mai i le Paeaiga fou. Ona e mafaufau loloto lea o oe, po o le a sau galuega sa fai. Pe sa e tafao i lenei lima tausaga. Po o le a lau galuega sa fai, ioe. O le fua e te lulu, that's what you harvest. O le tautinoga lena. I lenei la afiafi, le paia e ma le mamalu o le tatou Maota, aua tatou te atuatuvaale, aua o lea ua tatou oo nei, o si au mea lava na fai e te toe tautau ai lava, a o si au koluse o lo o faalumaina ma fanau ai mea sili mo oe.

*Na faamaonia le lafo ma faitauina le Tulafono Tau Faaofi o Teuteuga o le Tulafono o Faiga Palota (Nu 5) 2015 i lona faitauga faalua.*

## **TULAFONO TAU FAAOFI O TEUTEUGA O LE TULAFONO O FAIGA PALOTA (NU 5) 2015 - iloiloga auiliili**

**FOFOGA FETALAI:** Talu ai ua ou taulimaina le Tusi Faamaonia o le Tulaga Faanatinati ua maea foi ona sainia e Lana Afioga Mamalu O Le Ao o le Malo le Tulafono Tau Faaofi lenei, o lea o le a sagai atu loa le Fono Aoao mo le iloiloga auiliili.

E tusa ai ma le Tulafono Tumau 102, e amata le iloiloga auiliili o le Tulafono Tau Faaofi i lona Fuaiupu 2.

### **FUAIUPU 2: Ua teuteuina le fuaiupu 5.**

*Faamaonia.*

### **FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o Faiga Palota (Nu 5) 2015.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o Faiga Palota (Nu 5) 2015 e aunoa ma se Teuteuga.*

**TULAFONO TAU FAAOFI O TEUTEUGA O LE TULAFONO O  
FAIGA PALOTA (NU 5) 2015 - faitauga faatolu.**

**Afioga Hon FIAME NAOMI MATAAFA:** Faafetai atu i le Maota mo le talia e aunoa ma se Teuteuga lenei Tulafono Tau Faaofi. Ma ou te fiafia lava e faapea atu ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Faiga Palota (Nu.5) 2015 i lona faitauga faatolu.*

*Faaluaina e le Sui Palemia, Minisita mo Galuega tau Alamanuia ma Atinae a le Malo ma le Minisita mo Fesootaiga ma Faamatalaga Tekonolosi.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaio Faitulafono.*

**TULAFONO TAU FAAOFI O LE OFISA E FAAFOEINA MOLIAGA  
TAU SOLITULAFONO 2015 – iloiloaina auiliili**

**FOFOGA FETALAI:** E tusa ai ma le Tulafono Tumau 106, e tataua ona faamaonia muamua e le Fono Aoaio le Lipoti a le Komiti i le Tulafono Tau Faaofi ona avanoa ai lea o le iloiloaga auiliili o le tatou Tulafono Tau Faaofi.

Tulai mai lau Afioga i le Taitaifono o Mataupu tau Faamasinoga, Leoleo ma Falepuiupui ma Faamasinoga o Fanua ma Suafa.

**Tofa TUISA TASI PATEA:** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoaio le Lipoti a le Komiti o lo o fautuaina ai, Ina ia faagasolo le Tulafono Tau Faaofi o le Ofisa e Faafoeina Moliaga Tau Solitulafono 2015 faatasi ma Teuteuga.*

*Faaluaina e le sui usufono mo Gagaiifomauga Nu.1, se tasi o sui usufono mo Vaimauga Sisifo, Tofa Lenatai Victor Faafoi Tamapua, sui usufono mo Gagaiifomauga Nu.2 ma le sui usufono mo Falelatai ma Samatau.*

**FOFOGA FETALAI:** E faasilasila atu ua faamaonia nei e le Fono Aoaio le Lipoti a le Komiti o Mataupu tau Faamasinoga, Leoleo ma Falepuiupui ma Faamasinoga o Fanua ma Suafa i le Tulafono Tau Faaofi o le Ofisa e Faafoeina Moliaga Tau Solitulafono 2015.

O le a tatou sagai loa le Fono Aoaio i le Iloiloaga Auiliili o le Tulafono Tau Faaofi o le Ofisa e Faafoeina Moliaga Tau Solitulafono 2015.

E tusa ai ma le Tulafono Tumau 102, e amata le Iloiloaga Auiliili o le Tulafono Tau Faaofi i le Fuaiupu 2.

**FUAIUPU 2: Faamatalaina o uiga o upu.**

*Faamaonia.*



**FUAIUPU 3: O le Tulafono e noatia ai le Malo.**

*Faamaonia.*

**FUAIUPU 4: Faavaeina o le Ofisa ma le Minisita e fitoitonu i ai.**

*Faamaonia.*

**FUAIUPU 5: Tulaga tumaoti.**

*Faamaonia.*

**FUAIUPU 6: Galuega Tauave.**

**Tofa LEALAILEPULE RIMONI AIAFI:** Lau Afioga i le Fofoga Fetalai.

**FOFOGA FETALAI:** O le a le fuaiupu lau Afioga i le sui usufono?

**Tofa LEALAILEPULE RIMONI AIAFI:** O le Fuaiupu 6 faamolemole.

**FOFOGA FETALAI:** Ia tulai mai, galuega tauave.

**Tofa LEALAILEPULE RIMONI AIAFI:** Ia, sa faapea ita o le a alu motu le tatou Tulafono Tau Faaofi o lea ua manaia. Na o sina fesili la lau Afioga i le Fuaiupu 6. Sa fesiligia, o le fesili, e i ai auaunaga lea e faatino nei e nai Leoleo, Malu o le Malo i le taimi nei. O le fesili pe o maua se avanoa e mafai ona tuufaatasi ai pe tuu se avanoa i nai Leoleo ia e faigaluega faatasi ai i lalo o le Matagaluega fou lea, e fesoasoani foi ia i latou ma build ai foi le latou capacity ma le latou career. Ma ma le faaloalo lava.

**Tofa TUISA TASI PATEA:** Faafetai mo le faafesili. Masalo o le tulaga lena o le a i ai nei fuafuaga uma foi o lo o faagasolo e le tatou Ofisa fou lena e pei foi ona avatu i lalo o le Fuaiupu 25 o le Tulafono. Ia o lena o lo o manino, ae o le tulaga lena o le a aiaia foi i le vaega fou lea o le a see i ai le auaunaga lena. Faafetai.

*Faamaonia.*

**FUAIUPU 7: Tiute o tagata faafoe moliaga.**

*Faamaonia.*

**FUAIUPU 8: Faatonuga.**

*Faamaonia.*

**FUAIUPU 9: Galuega tauave, malosiaga ma le tulaga tumaoti.**

**FOFOGA FETALAI:** O le Fuaiupu 9 o lo o i ai le Teuteuga, tulai mai le Taitaifono.

**Tofa TUISA TASI PATEA:** Lau Afioga i le Fofoga Fetalai ou te faatu le Teuteuga i le Fuaiupu e 9 e faapea:

**“TEUTEUGA:**

**Fuaiupu 9 (1)(a)**

Ia faaofi le parakalafa laitiiti fou (iv) ma faitauina ai le (iv) e faapea:

**“(iv) afai e manatu le Faatonu o se tulaga e manaomia i le faia ai o le amiotonu, ona talosagaina le Loia Sili e faatino malosiaga, galuega tauave ma tiute o le Faatonu.”**

**Fuaiupu 9(1)(c)(iii)**

Ia aveese upu: “fesoasoani i le Loia Sili” ma faitauina ai le (iii) e faapea:

**“(iii) mataupu e faasino i le auina ese atu i fafo o tagata solitulafono ma fesoasoani soofaatasi i mataupu tau solitulafono;”**

*Faamaonia le Teuteuga.*

*Faamaonia le Fuaiupu 9 e pei ona Teuteuina.*

**FUAIUPU 10: Tuutuuga.**

*Faamaonia.*

**FUAIUPU 11: Aveesea ma le faamalolo lē tumau.**

**Tofa LEALAILEPULE RIMONI AIAFI:** Lau Afioga i le Fofoga Fetalai.

**FOFOGA FETALAI:** O le fuaiupu e fia Lealailepule?

**Tofa LEALAILEPULE RIMONI AIAFI:** O le Fuaiupu 10 faamolemole, ona o lea sa ou fesiligia i le taimi na faatalanoaina ai le Tulafono ona o le tulaga lea ua i ai mo le tofiaina o le Ofisa Sili fou o le a i ai e 6 tausaga e pei ona i ai isi tofiga foi nei o sui o le Palemene pei o le Suetusi Sili ma le Ombudsman. Peitai, o le tofiga lea o le Ofisa Sili o le Suetusi Sili aemaise foi le Faletupe Tutotonu (Central Bank), o lona e i ai le tapulaa e lua paeaiga sosoo ona malolo tumau loa lea.

O le ala lea sa fesiligia ai, ina ia i ai se consistency e laugatasia. E pei ona fesiligia e le Komiti lea tulaga pe aisea ua i ai pea le avanoa e faaauau pea le tofiga lea e ese mai isi tofiga ia ua tofia e le Palemene. Ma lou faaaloalo lava.

**Tofa TUISA TASI PATEA:** Faafetai lava mo le faafesili. Ia o lona lava e manino i le tulaga lona o le tuutuuga, o le Faatonu e agavaa mo le toe tofiaina, e le o i ai se vaitaimi o aumaia.

Ia o le tulaga lona, faafetai.

**Tofa LEALAILEPULE RIMONI AIAFI:** Lau Afioga, se e le o faamalieina lou sui usufono i le tali pe afai o le tali lea. O le fesili pe na fesiligia e le Komiti, aua o lea sa laga i le taimi o le faatalanoaina o le mataupu. E aoga e tagatagai i ai i le agai i luma aua e le faapea na o le tasi se Ofisa Sili o le Malo. O le a fesiligia foi e isi Ofisa Sili, po o ai le Ofisa Sili e 3 tausaga a o ai le Ofisa Sili e 6 tausaga, 12 tausaga, a o ai le Faatonu Sili e faaauau ai pea.

E pei o le mea lea o lea e tau agai i ai se fesili. Ma le faaaloalo lava.

**FOFOGA FETALAI:** Ia malie ia le sui usufono e manatu o lea ua tali le Taitaifono, ia o le tali lona.

*Faamaonia le Fuaiupu 10.*

*Faamaonia le Fuaiupu 10 e pei ona Teuteuina.*

**FUAIUPU 12: Sui Faatonu.**

*Faamaonia.*

**FUAIUPU 13: Tuuina atu o malosiaga.**

*Faamaonia.*

**FUAIUPU 14: Feutagaiga ma le Loia Sili.**

*Faamaonia.*

**FUAIUPU 15: Aga tausili, taiala faavae ma le Tulafono laititi o amioga pulea.**

*Faamaonia.*

**FUAIUPU 16: Matafaioi a le Faatonu.**

*Faamaonia.*

**FUAIUPU 17: Tofiaina o le aufaigaluega ma le auina atu o le aufaigaluega e galulue i isi galuega**

*Faamaonia.*

**FUAIUPU 18: Totogi.**

*Faamaonia.*

**FUAIUPU 19: Fuafuaga autasi ma lipoti faaletausaga.**

*Faamaonia.*

**FUAIUPU 20: Tupe ma le sueina o tusi.**

*Faamaonia.*

**FUAIUPU 21: Puipuiga mai noataga tau le tagata lava ia.**

*Faamaonia.*

**FUAIUPU 22: Tusi taiala ma taiala.**

*Faamaonia.*

**FUAIUPU 23: Tulafono Faatonutonu.**

*Faamaonia.*

**FUAIUPU 24: Teuteuga faatupulaia.**

**FOFOGA FETALAI:** O lo o i ai le Teuteuga, tulai mai le Taitaifono.

**Tofa TUISA TASI PATEA:** Lau Afioga i le Fofoga Fetalai ou te faatu le Teuteuga i le Fuaiupu 24 e faapea:

**“TEUTEUGA:**

Ia aveese upu "isi tulafono e faasino i so o se", ma suia upu "maliega ma le faamaoniga" i upu "galuega tauave, tiute ma malosiaga" ma faitauina ai le faafuaiupu (2) e faapea:

"(2) E ui lava i le faafuaiupu (1), so o se galuega tauave, tiute ma malosiaga o le Loia Sili i so o se isi lava tulafono e faasino i moliaga po o taualumaga mo se soligatulafono mo se soligatulafono ua teuteuina ma ia suia e avea ma galuega tauave, tiute ma malosiaga o le Faatonu Faafoe Moliaga."

*Faamaonia le Teuteuga.*

*Faamaonia le Fuaiupu 24 e pei ona Teuteuina.*

**FUAIUPU 25: Aiaiga tau soloaiga ma aiaiga faasaoina.**

**FOFOGA FETALAI:** O lo o i ai le Teuteuga, tulai mai lau Afioga i le Taitaifono.

**Tofa TUISA TASI PATEA:** Lau Afioga i le Fofoga Fetalai ou te faatu le Teuteuga i le Fuaiupu 25 e faapea:

**“TEUTEUGA:**

Ia faaofi le parakalafa (d) fou e faapea:

**"(d) O le Faauluuluga o le Vaega e Faafoeina Moliaga Tau Solitulafono i le Ofisa o le Loia Sili i le taimi nei ua faatatauina e galue e avea ma Faatonu Faafoe Moliaga e tusa ai ma le fuaiupu 12 o lenei Tulafono seia oo ina faia se tofiga mauu e tusa ai ma le Mataupu 41A o le Faavae.**

*Faamaonia le Teuteuga.*

*Faamaonia le Fuaiupu 25 e pei ona Teuteuina.*

## **FAAMATALAGA:**

*Faamaonia.*

### **FUAIUPU 1 MA LE IGOA**

**FUAIUPU 1: Igoa puupuu ma le amataga**

**IGOA: Tulafono o le Ofisa e Faafoeina Moliaga Tau Solitulafono 2015.**

*Faamaonia.*

*Na faagasolo le Tulafono Tau Faaofi o le Ofisa e Faafoeina Moliaga Tau Solitulafono 2015 faatasi ma Teuteuga.*

### **TULAFONO TAU FAAOFI O TEUTEUGA O LE TULAFONO O TAMAITI 2015 - iloiloga auiliili**

**FOFOGA FETALAI:** E tusa ai ma le Tulafono Tumau 106, e tatau ona faamaonia muamua e le Fono Aoao le Lipoti a le Komiti i le Tulafono Tau Faaofi ona avanoa ai lea o le iloiloga auiliili o le Tulafono Tau Faaofi.

Tulai mai lau Afioga i le Taitaifono.

**Tofa TUISA TASI PATEA:** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoao le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o Tamaiti 2015 e aunoa ma se Teuteuga.*

*Faaluaina e le sui usufono mo Falelatai ma Samatau, sui usufono mo Gagaiifomauga Nu.2, se tasi o sui usufono mo Vaimauga Sisifo, Tofa Lenatai Victor Faafoi Tamapua ma le sui usufono mo Gagaiifomauga Nu.1.*

**FOFOGA FETALAI:** E faasilasila atu ua faamaonia e le Fono Aoa le Lipoti a le Komiti o Mataupu tau Faamasinoga i le Tulafono Tau Faaofi o Teuteuga o le Tulafono o Tamaiti 2015.

O le a sagai atu loa le Fono Aoa i le iloiloga auiliili o le Tulafono Tau Faaofi o Teuteuga o le Tulafono o Tamaiti 2015.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

**FUAIUPU 2: Ua teuteuina le fuaiupu 2.**

*Faamaonia.*

**FUAIUPU 3: Ua teuteuina le fuaiupu 7A.**

*Faamaonia.*

**FUAIUPU 4: Soloaiga.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o Tamaiti 2015.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o Tamaiti 2015 e aunoa ma se Teuteuga.*

#### **TULAFONO TAU FAAOFI O TEUTEUGA O LE TULAFONO O GALUEGA TAU LEOLEO 2015 - iloiloga auiliili.**

**FOFOGA FETALAI:** E tusa ai ma le Tulafono Tumau 106, e tataua ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai le Afioga i le Taitaifono.

**Tofa TUISA TASI PATEA:** Lau Afioga i le Fofoga Fetalai ou te faatu le lafo, *Ina ia faamaonia e lenei Fono Aoa le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o Galuega tau Leoleo 2015 e aunoa ma se Teuteuga.*

*Faaluaina e le sui usufono mo Gagairomauga Nu.1, se tasi o sui usufono mo Vaimauga Sisifo, Tofa Lenatai Victor Faafoi Tamapua, sui usufono Gagairomauga Nu.2 ma le sui usufono mo Falelatai ma Samatau.*

**FOFOGA FETALAI:** E faasilasila atu ua faamaonia nei e le Fono Aoa le Lipoti a le Komiti o Mataupu tau Faamasinoga, Leoleo ma Falepuipui ma Faamasinoga o Fanua ma Suafa i le Tulafono Tau Faaofi o Teuteuga o le Tulafono o Galuega tau Leoleo 2015.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

**Tofa LEALAILEPULE RIMONI AIAFI:** Lau Afioga i le Fofoga Fetalai.

**FOFOGA FETALAI:** Ia se i tulai mai le sui usufono mamalu mo Faleata Sisifo.

**Tofa LEALAILEPULE RIMONI AIAFI:** O le fesili i lau Afioga i le Taitaifono, pe na fesiligia pe mafai ona toe tusi talosaga mai i latou ua malolo i le taimi nei ae le i aulia le 65 tausaga. Ia pe na toe tagai foi i tulaga sa laga i taimi o lauga i le toe fetuunai o le tausaga retire mai le 55 agai i luga i le 60 ona o lea pei ua tele le va mai le 55 i le 65. Ma le faaaloalo lava faafetai.

**Tofa TUISA TASI PATEA:** Faafetai. E ese le faigofie o le Tulafono ae taumafai lava le sui usufono lea e faafaigata. Ia, o le tali atu, na fesili uma lava i ai le matou Komiti, o le taimi nei, o lena e i ai aiaiga i totonu o le Tulafono e mafai ai ona tusi talosaga uma i latou e pei ona i ai i le 55 tausaga i le 65 tausaga pei ona i ai le tatou Tulafono lea o le a pasia nei. Ona fuafua lea e le Afioga i le Komesina po o le a le tulaga o le a i ai uma i latou nei, po o agavaa, po o maua le malosi e fai uma siaki faale-fomai. O tulaga uma na e pei ona i ai, po o lava foi le lelei o le mafaufau ae aiaia lava e le Afioga i le Komesina. O le tali atu lea i lau Afioga.

**Tofa LEALAILEPULE RIMONI AIAFI:** Ia vaai la i le manaia. Faafetai lava i lau Afioga i le Taitaifono. O le mea lea e ala ai ona ou fesili, se i e shine mai foi lea se i matou faalogologo, po o le a se mea o e nofo ma oe. Ma le faaaloalo lava.

**Tofa TUISA TASIA PATEA:** E tai pei o le iila foi lea a? Faafetai.

**FOFOGA FETALAI:** All that glitter is not gold.

**Afioga TOEOLESULUSULU CEDRIC POSE SALESA SCHUSTER:** Faafetai lau Afioga i le Fofoga Fetalai mo le avanoa. E leai o le vaega lava lea e fia avatu ai le faafesili i le Afioga i le Taitaifono, on ape o le tulaga la lea a mafai ona apply e extend, pe alu ai lava i le totogi lea. Ona e matau atu a litaea faiaoga ae toe re-hire, e pei lava e alu i lalo le totogi. Ae po o le tulaga lea e mafai lava ona retain ma alu ai lava i le totogi tuai lea e i ai, pei o se faataitaiga o se Superintendent po o se tagata maualuga, pei a oo loa i le taimi e retire ai e toe retain le service, e toe sau i lalo le totogi ae laitiiti le vaega e faaogaina ai lana service.



**Tofa TUISA TASI PATEA:** O le Tulafono lea, o i latou o lo o i lalo o le workforce o lo o current pea le latou service, existing. O lona uiga e leai se mea o le a suia ai fua le latou totogi. O le tali puupuu atu lea.

**FUAIUPU 2: Ua teuteuina le Fuaiupu 46.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o Galuega tau Leoleo 2015.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o Galuega tau Leoleo 2015 e aunoa ma se Teuteuga.*

**TULAFONO TAU FAAOFI O TEUTEUGA O LE TULAFONO O TUPE TEUFAAFAIGALUEGAINA MAI FAFO 2015 – iloiloga auiliili**

**FOFOGA FETALAI:** E tusa ai ma le Tulafono Tumau `106, e tatau ona faamaonia muamua e le Fono Aoa le Lipoti a le Komiti i le Tulafono Tau Faaofi ona avanoa ai lea o le Iloiloga Auiliili o le Tulafono Tau Faaofi.

Tulai mai le Afioga i le Taitaifono o le Komiti o Mataupu tau le Va i Fafu, Fefaatauaiga ma Tupe Maua.

**Tofa SOOALO MENE (Taitaifono, Komiti o Mataupu tau le Va i Fafu, Fefaatauaiga ma Tupe Maua):** Lau Afioga i le Fofoga Fetalai ou te tulai atu ma le faaaloalo e faatu le lafo, *Ina ia faamaonia e lenei Fono Aoa le Lipoti a le Komiti o lo o fautuaina ai, Ina ia faagasolo le Tulafono Tau Faaofi o Teuteuga o le Tulafono o Tupe Teufaafaigaluegaina mai Fafu 2015 e aunoa ma se Teuteuga.*

*Faaluaina e le sui usufono mo Aiga i le Tai, sui usufono mo Falelatai ma Samatau, se tasi o sui usufono mo le Vaimauga Sisifo, Tofa Lenatai Victor Faafoi Tamapua ma le sui usufono mo Gagaifomauga Nu.1.*

**FOFOGA FETALAI:** E faasilasila atu ua faamaonia nei e le Fono Aoa le Lipoti a le Komiti o Mataupu tau le Va i Fafu, Fefaatauaiga ma Tupe Maua i le Tulafono Tau Faaofi o Teuteuga o le Tulafono o Tupe Teufaafaigaluegaina mai Fafu 2015.

E tusa ai ma le Tulafono Tumau 102, e amata le Iloiloga Auiliili o le Tulafono Tau Faaofi i le Fuaiupu 2.

**FUAIUPU 2: Ua teuteuina le fuaiupu 2.**

*Faamaonia.*

**FUAIUPU 3: Ua teuteuina le fuaiupu 3.**

*Faamaonia.*

**FUAIUPU 4: Ia faaofiina le fuaiupu 8B.**

**Tofa LEALAILEPULE RIMONI AIAFI:** Lau Afioga i le Fofoga Fetalai....

**FOFOGA FETALAI:** O le a le fuaiupu le sui usufono mamalu?

**Tofa LEALAILEPULE RIMONI AIAFI:** O le Fuaiupu 4.

**FOFOGA FETALAI:** Tulai mai le sui usufono mamalu.

**Tofa LEALAILEPULE RIMONI AIAFI:** Faafetai. Lau Afioga i le Taitaifono, faamolemole, o lea ua matau, o lea ua sui mai tai tausaga ma faafou laisene. O le fesili i lau Afioga, e tai fia tausaga sa i ai? Afai la o lea ua sui mai tai tausaga, e fia la se totogi ua i ai aua o lea ua sau o lea e faaupu mai, o le a i ai ma le totogi i le tausaga. O le fesili la lau Afioga, pe tai fia tausaga ma faafou le mea lea sa i ai. Afai la o lea ua sui mai tai tausaga, e fia la se totogi o le a i ai i le tausaga. Ma le faaaloalo lava.

**Tofa SOOALO MENE:** Faafetai lau Afioga i le Fofoga Fetalai. O le tulaga o lo o i a ii le taimi nei, e le o i ai se tapulaa foi lea e fai ma toe faafou le tulaga lea o le faafouga o laisene. Ae pau le mea la e ua tagai i ai le Matagaluega, e tai ono masina lea e tuu ia i latou nei e mafai ona lipoti mai foi lea e iloa ai po o a tonu a latou pisinisi o lo o faatinoina. Peitai, e uma lava le ono masina e le o mafai ona lipoti mai. O le ala foi lea ua manatu ai foi le Matagaluega ma le Malo, e manaia pe a tuu i ai se tausaga se tasi e faapena ona tulituliloa ai po o a latou galuega o fai, aua o lea e faapea lava tatou o la e fai pisinisi ae ailoga o faia ni pisinisi, na o le avatu lava o le laisene faaoga e latou le laisene mo isi a latou foi faiga faapisinisi, a o le agaga tonu lena o le Teuteuga lea lau Afioga i le Fofoga Fetalai. Ma lou faaaloalo lava.

*Faamaonia le Fuaiupu 4.*

**FUAIUPU 5: Ua teuteuina le fuaiupu 9.**

*Faamaonia.*

**FUAIUPU 6: Aiaiga tau soloaiga.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o Tupe Teufaafaigaluegaina mai Fafo 2015.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o Tupe Teufaafaigaluegaina mai Fafo 2015 e aunoa ma se Teuteuga.*

**TULAFONO TAU FAAOFI O LE OFISA E FAAFOEINA MOLIAGA  
TAU SOLITULAFONO 2015 – faitauga faatolu**

**Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Ofisa e Faafoeina Moliaga Tau solitulafono 2015 i lona faitauga faatolu.*

*Faaluaina e le Sui Palemia ma le Minisita mo Tina ma Tamaitai, Atinae o Nuu, Afioga ma Agafesootai..*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O TEUTEUGA O LE TULAFONO O  
TAMAITI 2015 – faitauga faatolu**

**FOFOGA FETALAI:** Tulai mai lau Afioga i le Minisita mo Faamasinoga ma Pulega tau Faamasinoga.

**Afioga Hon FIAME NAOMI MATAAFA:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Tamaiti 2015 i lona faitauga faatolu.*

*Faaluaina e le Minisita mo Galuega tau Alamanuia ma Atinae a le Malo.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

**TULAFONO TAU FAAOFI O TEUTEUGA O LE TULAFONO O  
GALUEGA TAU LEOLEO 2015 – faitauga faatolu**

**Afioga Hon SALA FATA LISATI PINATI (Minisita mo Leoleo ma Falepuipui ma le Auaunaga o Tinei Mu):** Lau Afioga i le Fofoga Fetalai out e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o Galuega tau Leoleo 2015 i lona faitauga faatolu.*

*Faaluaina e le Minisita mo Galuega, Felauaiga ma Atinae Eseese, Minisita mo Aoga, Taaloga ma Aganuu ma le Minisita mo Tina ma Tamaitai, Atinae o Nuu, Afioga ma Agafesootai.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

**TULAFONO TAU FAAOFI O TEUTEUGA O LE TULAFONO O  
TUPE TEUFAAFAIGALUEGAINA MAI FAFO 2015 – faitauga faatolu**

**Tofa Hon FONOTOE NUAFESILI PIERRE LAUOFO (Sui Palemia, Minisita mo Pisinisi, Alamanuia ma Leipa):** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau faaofi o Teuteuga o le Tulafono o Tupe Teufaafaigaluegaina mai Fafo 2015 i lona faitauga faatolu.*

*Faaluaina e le Minisita mo Faamasinoga ma Pulega tau Faamasinoga, Minisita mo Galuega tau Alamanuia ma Atinae a le Malo, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu, Afioga ma Agafesootai.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoaofaitulafono.*

**FOFOGA FETALAI:** Ia, ona po ai lea o le tatou po. E momoli atu le agaga faafetai tele i le paia ma le mamalu o le tatou Maota i le onosai mai i lenei itula o le afiafi. A o le i fai atua le upu faaiu a le Fofoga Fetalai, ou te tapa lau Afioga i le Palemia.

**LAFO MO LE TOLOPOINA**

**Susuga Hon TUILAEPA FATIALOFA AUELUA LUPESOLIAI NEIOTI AIONO SAILELE MALIELEGAOI:** Lau Afioga i le Fofoga Fetalai out e tulai atu ma le agaga faaaloalo e momoli atu le faamalo i lau Afioga i lou lava onosai i le faafoeina o le Fonotaga i lenei aso atoa. E le faigofie. E faamalo foi i lau Afioga i le Taitai o le Itu Agai ma lona Itu, aemaise o lenei Vaega toatele, aemaise le Kapeneta, mai lava i le taeao analeila na tatou talanoa ai Tulafono nei ua leva foi ona tapena i ai le Malo. E ui lava la ina siisii le tulaga o tatou felafolafoaiga, ae i ai lava le taofi e mafua ona siisii saunoaga, ona o le taua o mataupu sa tatou talanoa i ai, tatou te

faitau eseese foi i le agaga o le Tulafono ma le faatinoga, aemaise lava le Tulafono Tau Faaofi o le Faiga Palota. E uiga ese foi lenei foi tausaga ma Teuteuga o tatou Faiga Palota. O i ina e atagia ai le agaga naunau o le tatou Malo, ina ia aua ne i tuua mafauauga lelei, aua e tasi lava le agaga o lea tatou te taumafai i ai, ia saofaga le faamoemoe aua le Faiga Palota ina ia aua ne i faalavelaveina, ia sao atoatoa le faaiuga e faia e le tagata i lana faaiuga o le ua ia talitonuina, e tatau ona filifilia e avea ma sui o le itumalo e tauavea le tofi. O tatou foi o meafaigaluega a le Atua, e auala mai ai le musumusuga lilo i Lona finagalo. E ui lava la ina siisii le Maota nei, a o uiga lava ia e matua i le oo. O lea ua atagia ai foi le agaga naunau, o a lava finagalo faaalua o le Maota aemaise lava le Itu Agai, e le o taliaaina e le Malo. O le mafuaaga foi lena o le teuteu pea ma le teuteu pea ina ia atagia ai a tatou galuega fai, o le amanaia o finagalo faaalua o a outou Afioga, i lau Afioga i le Taitai o le Itu Agai ma lena Itu o le Maota o lo o agaia le tatou Malo. E leai lava se galuega e le uma, o lea ua taunuu i se taunuuga taugamalie le faaiuga o Teuteuga, ma e le toe i ai nisi Teuteuga, o le a tatou agai loa i le Faiga Palota.

E le gata i lea, a o lea foi ua matauina le aofaiga o Tulafono ua faia faitauga faatolu, e lima le aofai, ua leva foi ona taliga nisi o nei Tulafono Toe Teuteu, aemaise lava le Tulafono a Leoleo, lea e mafai ai ona toe faaauau nisi ua iloga foi le latou tomai. E le aveesea lava upu a Toeaiina, o le tele o tausaga o le tagata o le tele foi lena o lona iloa, aemaise i latou ua leva ona tautua i le tatou atunuu, e ala foi i lenei galuega faa-leoleo. E momoli foi le faamalo i le Afioga i le Komesina ma le aufaigaluega o alii ma tamaitai o Malu o le Malo tatou te faalagolago i ai i le tausiga o le filemu.

Lau Afioga i le Fofoga Fetalai, o upu puupuu na e avea ai au ma sui o le Kapeneta e momoli atu ai le faamalo i le lavapapale foi o le tatou Maota nei ma le onosai, o lenei ua vaeseuga foi mai le taeao se i tau mai lava i le taimi lenei, o lea lava tatou te galulue i o tatou tiute na tofia ai i tatou.

E faamalo foi i le tapuaiga a Lana Afioga Mamalu o Le Ao o le Malo, Sui o le Fono a Sui Tofia faapea foi le Faamasino Sili ma le Vasega o Alii ma Tamaitai Faamasino i le latou foi matafaioi i le taputapu mai i o outou faiva, e faapena foi i le faafogafoga mai a Samoa i ona tulaga faalupe i felafolafoaiga. O le a lava le tulaga o le lagalaga o taofi, ae tasi lava le agaga, ia tatou taunuu i se taunuuga lelei, ma faalautele ai foi le latou malamalama i le faafogafoga mai pea o feeseeseai lava le fefaaaliga o taofi, e leai se itu e le i oooo lava i ai lo outou finagalo sailimalo.

E faamalo foi i le aufaigaluega i lo outou galulue pea lava pea i le tautuaina o le tatou Maota nei ina ia sologa i le tulaga taugamalie felafolafoaiga aua le faatinoina o tatou galuega e pei ona tofia i ai tatou.

Lau Afioga i le Fofoga Fetalai, o se upu puupuu lena o le agaga o le faafetai i le tapuaiga a lo tatou atunuu, e faapea foi a outou Afioga i le galulue mai lava i le taeao seia oo mai i lenei taimi mo le tau uunaia o tatou Tulafono.

O lea ou te tulai atu ai e faaiu upu i le faatu o le lafo. O le lafo e faapea, *Ina ia tolopoina nei le Fono Aoa Faifulafono seia aulia le Aso Lua, 20 Oketopa 2015.*

Lau Afioga, o le lafo lena.

*Faaluaina e le Sui Palemia, Minisita mo Galuega tau Alamanuia ma Atinae a le Malo ma le Minisita mo Tina ma Tamaitai, Atinae o Nuu, Afioga ma Agafesootai.*

## **ISI FAASILASILAGA A LE FOFOGA FETALAI**

**FOFOGA FETALAI:** E manatu o le a le toe faasilia se leo, o lea ua saunoa le Palemia, ma e i ai le talitonuga tatou ave lea i uta. O lea ua lava ma totoe le saunoaga a le Palemia e faapai atu ai i lo outou paia ma lo outou mamalu ona o la outou lavapapale ma le faatoatoaina o le tatou galuega i lenei aso. E le toe i ai se isi gagana e sili atu nai lo le agaga faafetai, o lea foi ua faapai i le tapuaiga a le tatou atunuu. E momoli atu foi le onosai ma le faamalo. Na pau lava o lea, e faamalulu atu foi i le suaga o le vaatele i se upu foi ma se gagana ua le tautamalii i le taumafai atu a le Fofoga Fetalai, e talitonu lava le faamoemoe e leai se tautai e atoatoa. Afai ua sala le pati pe sala le gagana, e faamalulu atu, a o le agaga ina ia faataatia i lagatonu le tatou galuega ma sologa lelei i le tulaga e tataua ona i ai, o lo o tapuai mai le atunuu o e na filifilia maia tatou tatou te omai e fai tonufai aua se manuia o le tatou atunuu.

O lo o i ai le taligamalo a le tatou Malo o lea e tapena nei, pei ona silafia tatou malo o taaloga a le Commonwealth. O le tatalo na aumai, malilie sui usufono mamalu o le Palemene, e tataua lava ona faaoo mai outou ata e fai ai outou Id Cards e mafai ai ona outou access i totonu o taaloga nei. O se sui usufono e manatu e avanoa e faaoo mai i le tatou Ofisa o le Fono, o lea na oo mai le latou talosaga, o se e avanoa, afio atu i tai e pue lou ata, o se e le avanoa, momoli atu i tai lou ata pe a faapea e te fia auai i taualumaga o le fonotaga lea.

O le isi faasilasilaga a le Fofoga Fetalai, ou te talitonu o le po mulimuli lenei ua tatou toe Fonoa ai le Maota lenei o Tuiatua. O le isi a tatou Fonotaga o lo o lumanai nei i le aso 20 Oketopa, o le a tatou agai loa i le tatou Fonotaga i le Maota Fono ua saunia e faai ai lenei Paeaiga ma faafeiloai ai le Paeaiga fou. E tatalo atu ai i le paia ma le mamalu o le tatou Maota Fono, o a uma meatotino, o au Pepa o Galuega, o mea uma tau le sui usufono lava ia o lo o i ou autafa i le taimi lenei, o lea ua saunia e le tatou Ofisa pusa, finagalo malilie, o le po nei lava e tapena ai ma e afio ma oe i le fale, ona e i ai tulaga, ua outou silasila i le mea la e fai i Mulinuu, ua tala uma le tatou galuega, ua tele le mea o lo o taumafai i ai le Ofisa e tau faatulaga. Ae lelei lava le afio o le sui usufono ia ma lana pusa i le fale, e te usu sao atu lava ma oe i le aso 20 Oketopa i uta i Tuanaimato. Ua matua le iloa e le fanau nei le mea o le a lau i ai tatou pepa, sii atu sii mai, sii i fafo, sii i totonu. A o le talosaga, le paia e ma le mamalu o le tatou Maota Fono, o lea e avanoa le taimi lenei, o lo o i ai foi alii ma tamaitai faigaluega e fesoasoani i lo outou mamalu, e tapenapena malie au meatotino i au pusa, ma o atu le afaigaluega e momoli atu i a outou taavale.

O le talosaga lea ma le agaga faaaloalo ina ia aua ne i i ai se mea e tasi e tuua, aua foi ne i i ai ni mea e toe oo i tai i Mulinuu, e le o toe i ai se tatou Maota Fono i Mulinuu ae afio atu lava le sui usufono mamalu ma avatu lau tapenaga mo le tatou Fono i le aso 20 Oketopa ma avatu uma tulaga ia. O le talosaga lea ma le agaga faaaloalo, e talitonu o le a outou talia mai.

Ia, ae le i faaiuina le tatou Fono i lenei afiafi, le paia e ma le mamalu maua o le tatou Palemene, tatou tuufaatasi le tatou faamanu ma le

faafetai i le Atua e avea ai le Susuga i le Faafeagaiga ia Tapuai e fai se tatou tatalo faaiu, ona tatou malolo ai lea.

*Na tolopo Taulumaga a le Fono Aoa o i le itula e 9:00 i le po seia aulia le Aso 20 Oketopa 2015 i le itula e 9:00 i le taeao.*